

北
墅
抱
瓮
錄

東坡云士大夫逢時遇合。跬步至公卿。非難而歸田爲難。此雖有激之言。至謂歷官釋肩而去。如大熱遠行。雖未到家。得清涼館舍。解衣漱濯。已足樂矣。此非親履其境。意適於中者。不能道。歐陽公之切於釋位歸田也。至欲以得罪去。其言發於至性。如飢者之不忘食。益知士非求進之難。而乞身之難也。余以陋劣。謬直禁幄。十有三年。夙夜惴惴。惟負職是慮。顧君恩深重。未敢言歸。每作草堂諸圖。以自沈。已巳冬日。仰

託聖恩放歸田里。急就北墅。薙荒刪穢。修植竹樹。分畦種菜。手自灌溉。雖體有微勞。而心無驚怖。合之東坡大熱遠行。初得解衣漱濯之語。殊是有味。益信歐陽之欲以得罪而去之。非藉口也。因疏墅中花竹草木果蔬藥蔓之屬。爲抱瓮錄。昔東坡在南海。食蠔而美。貽書叔黨曰。無令中朝士大夫知。恐爭謀南徙。以分此味。余亦不願。輦下諸君子見此錄。使知退閒之有以樂其樂也。康熙庚午秋七月江邨高士奇識。

北墅抱瓮錄

竹窻 高 士奇

梅

梅花寒香玉骨迥出塵表。墅中古榦數百本，構小亭其中。早春破萼，香雪周遮，獨坐長吟，清人肺腑。至於水涯籬次，叢竹怪石之畔，間植數株，橫斜鬱曲，各具標格。梅種不一，以綠萼爲上品，玉蝶次之，單瓣野梅又次之，紅梅姿韻芳妍，艷而不冶，其開在諸梅之先，寒林點綴，尤不可無。

也

桃

桃花有紅、白、粉紅、深粉紅、單瓣、大紅、千瓣、粉紅、單瓣、白、千瓣、白、諸類、爛漫芳菲、色甚嫵媚、其可供玩者、莫如碧桃、人面桃、二種、園中臨水植之、不但取果、二月花時、曉煙初破、宿露未收、早起觀之、大有幽趣、若夫晴陽媚日、與新柳互交遞、倚、又是一番佳致、

李

李樹極可久、發花裏枝、縞如積雪、入夜尤明、無月時亦璀璨炫目、與山桃雜種、兩色交錯、遠望芳菲、至其繁香清趣、山桃又在下風。

梨

梨花膩白如玉、綽約有態、江南二月、每多風雨、此花經雨、轉覺姿媚動人、月下亦佳、所謂梨花院落溶溶月也。

杏

杏花非紅非白、顏色頗妍、多種成林、極有風致。

廣圃荒池、偃仰映帶、宛然邨陌、攜壺藉草、興復不淺。

櫻桃

酣春榭、旁有小圃、雜樹參差、櫻桃尤多、仲春發花、嬌冶多態、結實圓勻、瑩徹儼然、絳珠玉液、芳津甘澗、齒頰李義山詩、越鳥誇丹荔、齊名亦未甘、早已爲之長價矣。

枇杷

園中枇杷樹、皆數拱、貫霜雪而愈茂、秋萌冬花。

春實夏熟備四時之氣果色正黃昔人稱爲蠟
兒廣州產無核者名曰焦一作椒子其花今多目
爲欵冬非也按本草圖經欵冬乃爾雅所謂菟
奚顆生冰雪中枝莖不大欵冬枇杷皆凌冬而
花故訛爲一耳

楊梅

江南諸果以楊梅爲冠有紅白紫三種河朔蒲
萄瀘南荔子與此差堪鼎足晚花軒前所種乃
出項里者陸放翁所謂項里楊梅鹽可撒是也

放翁自注、楊梅酸者乃薦以鹽、佳品未嘗用、因謂太白玉盤楊梅爲君設、吳鹽如花皎白雪、未諳物理、果然。

林檎

林檎花與蘋果相似、開亦同時、園中約及百樹、新花滿隄、佳實出林、俱可耽愛、右軍帖、青李來禽、子皆囊盛爲佳、函封多不生、可知古人於此果珍重護惜、不視爲常產也。

荔枝

平湖去海僅三十里，偶有閩客攜鮮荔枝泛海來者，值風利，兩日夜達此，色味俱未變，白香山云：殼如紅繒，膜如紫綃，瓢肉潔白如冰雪，漿液酸甘如醴酪，非妄語也。私幸殊方珍果，得嘗所未經，因取其核埋著土中，發苗一莖，葉似楊柳，初生淡白，數日色漸紅黃，又數日始成綠色，每兩葉相對而發，月餘後已高尺許，雖未必能花實，園中萬卉雜陳，正不可少此異品耳。

木瓜

蘭渚左偏木瓜一株最盛花藥類海棠而色較紅實如小瓜黃潤可愛香極醲馥以一二枚置坐隅清芬滿室可經數月

佛手柑

土人遺佛手柑二株并授培溉之法枝葉密茂三四月發花紫白色開落相繼至十月不斷每樹止留實五六枚長俱半尺大可一圍餘經冬鮮潤養至次年之夏異香清馥迥出物表意特愛之令人圖其根葉花實之狀裝爲小卷而題

詩於後以紀其盛焉

香櫞

香櫞四月發花青蒂白萼氣味芳烈過於橙橘
江邨草堂後一樹嘗結實百餘枚星毬月魄磊
落滿枝殊屬異觀摘置几案久而彌香

橘

果中橘最可珍香色味皆冠絕羣品噉一二顆
可以蠲煩滌悶沁潤詩脾有朱橘有綠橘有蜜
橘味絕甜美魏文帝云南方有橘其酢正裂人

山雪抄卷五
五
牙至謂其品出蒲萄之下，殊非定論。花亦清香，細如點雪，深可愛玩。

橙

橙瓢極酸，皮甘辛而香，宿醒倦困時得此昏思頓洗，功在茶薺之上。古者嘗取以茗，鮮七命所云和以春梅，燁以秋橙，今人未有用之者。

牛妳橘

牛妳卽金橘之長者，以其形而名之。秋深始黃，經冬不落，垂金燦爛，滿樹離離，以盆植之，置深

室中極佳

金橘

金橘小於彈丸，酸多於甘，擘之香霧芬烈，齋前
二株，每樹皆得斛許，酒渴採嘗，風味殊別。

枳殼花

枳比橘爲小，枝幹沉綠多刺，花極香，過橙橘遠
甚，藥珠圓瑩，儼猶茉莉，而其大倍之，野人門巷
藉此以護籬落。

柿

烏桺之柿、從昔稱之、世傳此樹有七絕、一多壽、
二多陰、三無鳥巢、四無蟲蠹、五霜葉可玩、六佳
實可噉、七落葉可以臨書、秋柯坪左右各有數
株、大而多實、亭亭聳拔、鬱然成林、

石榴

南方石榴佳種、不易得、園內亦不多植、惟水傍
有大紅臺榴、一二株而已、當仲夏之時、新綠初
齊、遠近一碧、惟榴花烘晴、映日灼灼、欲然可謂
絢爛矣、近又得一鑲邊紅、千瓣白、松花色者、不

異綺綃簇成、尤爲罕有。

銀杏

銀杏花、夜開旋沒、罕得見、葉最繁密、片有刻缺、如鴨脚形、霜後葉色變黃、映以丹楓、爛若披錦、秋林黯淡、得此改觀。

榧

榧木紋理細緻、製器極雅、其葉類杉、黃花紫實、逃禪閣檐廊之下、偶得一本、結子甚多、舊有玉山果之名、殆以堅潤之性、比德於玉耶。

核桃

核桃葉厚而多陰、瀛山館前、隔岸土岡隆起、雜樹森立、核桃亦種其中、園多鳥雀、諸果熟時、輒被摧啄、惟核桃以味潛得免、蓋外炫者易敗、而中固者不傷、雖小物亦足感耳。

棗

棗樹枝柯勁拔、花細小而香、頗幽、輕風飄拂、芬馥如蘭、結實滿枝、青紅相雜、抱瓮陂上有小亭、戲書棗熟、從人打葵荒、欲自鋤之、句揭之楹間。

瑞香

瑞香枝幹婆娑、葉深綠而邊有白色、繁花成簇、
香似薝蔔、極能透遠、一名睡香、相傳廬山僧臥
岩石間、夢聞花香、覺而得之、故有此名、早春萬
卉未吐、以此花爲梅之先驅、

臘梅

臘梅蜜蕊絳心、香氣濃郁、蘭渚軒一株、磬口種
也、雖經盛放、常若半含、花倍大於他種、品格珍
絕、

山茶

山茶種有不同，淺爲玉茗，深爲都勝，大爲山茶，小爲海紅，園中特多。此樹淺紅者早開，深紅者遲發，密葉沉綠，間以丹葩，萬藥繽紛，燦如蜀錦。十月卽花，檻外更有大紅寶珠一種，外苞六出，內萼千重，幾同剪簇所成，彌旬不落，射以晴陽，浥以宿雨，倍增絢麗，尤屬奇品。

海棠

海棠同名異種者不一，惟紫綿爲佳，今所稱西

府是也。万俟雅言詩云：海棠點點要詩催，日暮紫綿無數開。欲識此花奇絕處，明朝有雨試重來。正謂此種耳。園中海棠甚多，臥齋前一株，乃西川佳種，脂痕淺抹，逸態嫣然，有佳人遺世獨立之意，更不得以無香少之。

貼梗海棠

貼梗海棠，枝不能大，叢生單葉，綴枝作花，磬口深紅，若黏絳蠟，雖微乏韻度，而殷麗之色，要足取也。

垂絲海棠

海棠以櫻桃接之、便成垂絲、花瓣叢密、與海棠不同、而色略相似、重英向下、柔蔓迎風、婉孌之姿、如不自勝。

玉蘭

玉蘭喬柯上聳、絕無柔條、花開九瓣、着於木末、其白如玉、其香如蘭、花落後、葉從蒂出、綠蔭陰濃、極娛春晝、余武林舊居樓前、玉蘭一本、大可拱抱、花時倚檻吟賞、儼對藐姑冰雪之姿、自浮

沉京洛二十餘年，己巳春扈蹕南巡，始得重過舊里，而樹已不存矣。時作懷舊數篇，中有吟罷翠螺當檻入，粧成香霧卷簾看之句，蓋意之所耽，不忍忘也。今園中所植，亭亭明艷，不異舊觀。

繡毬

繡毬聚花成朶，團圓如毬。初開色本嫩綠，盛開則褪而成白，鏤瓊琢玉，不浣點塵。飄墜之時，繁朶滿砌，無異落梅，足供幽賞。閩中產紅繡毬。

尤爲艷異，惜不能移植耳。

辛夷

辛夷絕似玉蘭，有淺紅及紫二種，含苞未拆，尖銳有茸，儼然秃筆。江南以木筆呼之。黃鳥試鳴，曉英乍吐，褰簾坐對，春色正在此中。

梔子

梔子小於玉蘭，而香過之。山館幽僻之所，偶植數本，暑月發花，清芬滿院。

丁香

丁香有紫花有白花緣枝遍發極爲繁密南北之種不同京師丁香樹高者數丈葉大如紫荊江南所產枝幹不肥葉細而小惟花朵相似耳而春秋發花二次則勝於北產也

牡丹

牡丹雖盛於唐然謝康樂已言永嘉水際竹間多牡丹北齊楊子華有畫牡丹則此花之從來遠矣其名目至多宋錢思公作花品得九十餘種獨以黃紫爲貴今姚黃之種不傳惟紫者多

有次之莫如玉樓春以其姿韻酣妍香氣穠艷也園中得魏紫一本玉樓春數十本下甃白石旁設朱闌上張翠幙花大於盤重臺高及尺許絢爛繁華動盪心目所謂瑤臺金谷中人他花縱極明媚不得不讓一頭地矣

芍藥

芍藥之種古推揚州今以京師豐臺爲盛浙中雖無佳種惟培溉有方花亦頗大有紅白紫數色深淺不同曲院短垣下疊石砌排比種之燦

爛滿目、此花宿根在土、十月生芽、至春冒土而
出、紅鮮可愛、若花含曉露、嫵娜缺頰、大有美人
扶醉之態、

紫荆

紫荆叢生、花無常處、緣榦附枝、上下遍發、故又
名滿條紅、王敬美嘗云、此等花、雖非奇卉、而點
綴春光、不可無一、可謂知言、

棠梨

棠梨樹、如梨而小、又謂之野棠、花淺紅色、結實

如棗有赤白二種白棠子多酸美而澀赤棠子
澀而酸花亦可食丹鉛錄曰尹伯奇採葶花而
食葶卽棠梨也

綬帶

綬帶略同錦帶花葉斑斕相間枝條軟曼隨風
披拂有類於綬是以得名北地甚多南中頗少

杜鵑

杜鵑一名山躑躅唐詩五渡溪頭躑躅紅卽此
花也春晚發花密藥攢簇其色深紅久經風日

猶灼灼可愛玩蘭渚軒前多古松怪石植杜鵑
兩株於其下倍有風趣

紫薇

紫薇皮不頑皴淨滑可愛一枝數穎一穎數藥
有紅紫翠白諸色開花可經數月牆陰石角隨
處栽之瀛山尤多日久皆成連理當殘暑初消
繁英新吐苧衫葵扇雜坐花下啜茗清譚亦勝
事也

桂

桂分紅黃白三色。紅者曰丹桂，黃者曰金桂，白者曰銀桂。每秋發花兩度。丹桂有子，凡花之香者，或清或濃，不能兩兼。惟桂花清可絕塵，濃能透遠。一叢盛放，鄰牆別院，莫不聞之。江南好事者，多結之作屏。余園中小徑，鱗次種植，左右成行，接葉交枝，上不通日。花時金粟滿望。李義山所謂桂巷，殆不過是。

木槿

園中遶塹設籬，編木槿爲之。盤織縱橫，茂綠盈

望花不一種，有深紅淺紅藕色白色。至於重臺千瓣者，則似木芙蓉。雖榮謝不常，而鮮妍可愛。

合驩

合驩葉細如槐，比對而生。至暮則兩兩相合，曉則復開。花淡紅色，形類簇絲。秋後結莢，北人呼爲馬纓。取其花之象也。野牆荒塹之側，輒得數株。欲植之草堂前，以本大難遷，遂不復移。採其葉乾之，釀以爲酒，醇醲益人。

玉蘂

唐人最重玉藥種之集賢院中其後失傳不知玉藥爲何物并有疑卽是瓊花者近得一株似茶蘼而八出玲瓏明淨真冰雪姿也

金雀

金雀叢生如棘花生葉傍長條直上行列清疎取其小本種磁盆中下磊奇石一二似雲林片幅綽有可觀

玫瑰

四月百花已闌玫瑰始發濃香艷紫可食可佩

迴廊之外灌生作叢與醑醑相映京師有刺藤
卽玫瑰之黃者惜大江以南不能致之

月季

月季花有紅白淡紅三色香甚清越逐月一開
四時不絕種之籬落間晨露未乾鮮妍有態臘
中映雪愈覺泥人

木香

木香灌生長條易茂編籬引架芬芳襲人白花
紫心者香更清遠又有黃色一種香少遜而色

頗妍山栗破房乳鵝脫殼不足方其新艷也

薔薇

薔薇花有淺紅深紅大紅之異結花成屏雅宜山墅連春接夏蓓艷可人落紅成堆每不忍掃園後有絕大者二本緣高樹而上引下垂延蔓百尺花間樹杪如綴火齊又有白薔薇黃薔薇單瓣野薔薇分香鬪艷圍繞籬落各極勝賞

酴醾

酴醾香清而微蔓延高架露坐最宜其花青跗

紅萼開時變白架下可容十餘人中設石几與
二三同調盤礴其間共試早茗洵爲樂事

棣棠

棣棠花色金黃一葉一藥生甚蔓延春深與薔
薇同開可爲屏籬添色

夾竹桃

夾竹桃本嶺南種葉類竹而花類桃姿態娟媚
自初夏着花經秋乃歇草卉之最久者

金絲桃

金絲桃花五出比山桃較大而色黃心有長鬚
茸茸作縷頗具風格非俗艷所能比也

天竹

天竹枝葉瀟灑梅雨中開白花子結枝梢殷紅
璀璨纍纍若珠霜雪不落樹可久而難長紅雨
山房欄檻之前一叢百餘幹粗中把握殊不易
得

虎茨

虎茨枝不高大葉綠多刺花白子紅新花已開

舊實未落、間以密葉、三色互映、植之盆盎中、亦書室佳觀也。

慎火樹

慎火樹、葉光澤柔厚、夏開白花、相傳可以辟火、南方人多以盆種之、置屋瓦上、今閒栽石罅、确處、與其清寒之性相宜、其生尤盛。

紫藤

紫藤緣木而生、久之條蔓糾結、與樹連理、屈曲蜿蜒之狀、不異蛟龍、出沒二月、花發成穗、色紫。

而艷披垂搖曳一望煜然採供盤餐更屬佳品

葡萄

葡萄以西北所產爲佳南方不能得其種然結架牽藤涼陰覆院暑夕坐其下几簟皆有清意所植紫綠二種芳液甘醲固亦可敵醇醴也

金銀藤

金銀藤葉類薜荔細蔓緣籬三四月後開花不絕長及寸許一帶兩藥前後繼開此黃彼白故得金銀之名甚有清香殊於凡卉

薜荔

蘭渚前、繚垣周遭、短僅逾肩、薜荔緣壁上生、縱橫縈結、望之碧葉蒼然、山雨欲來、幽響槭槭、

錦荔枝

錦荔枝、藤蔓善緣、種薔薇屏下、翠葉滿籬、秋結荔子、青紅斑駁、中有甘液、鮮赤異常、

茅藤果

茅藤宜傍高架、着子最繁、小如桐實、秋霜之後、葉落子存、軟紅作串、積雪中色倍鮮明、又名雪

裏紅

蘭

蘭香最幽迥出羣卉之上號稱香祖古人多愛之羅疇云朝襲其馨暮擷其英攜書就觀引酒對酌可謂愛蘭之癖矣舊譜春蘭一莖一花以紫莖青花者爲上品青莖青花者爲中品非也惟莖淡白花淡綠心純素者爲玉根蘭又名素蘭格價最高青與紫皆不及蘭渚崖溪之間種之甚多

建蘭

建蘭極不易養，今得數盆，每盆各抽箭五十餘莖，含風受露，異香茂發。夏秋之際，清韻殊多。當湖蓄花之家，皆無若此之盛者。

蕙

楚辭旣滋蘭之九畹兮，又樹蕙之百畝。所指爲蘭者，乃澤蘭，非春蘭。所指爲蕙者，乃零陵香，非蘭類也。今人以九節蘭爲蕙，長莖秀擢，芳萼貫連，與春蘭相伯仲。光風晴日，近傍軒窗，幽情殊

恆

眞珠蘭

眞珠蘭出自閩粵木本狀似山梔葉叢生枝上一叢七葉者爲佳五葉者次之三葉者又次之花開成穗先青後黃圓細繁密若綴眞珠是以得名香芬特茂余得七葉者二樹高俱四五尺亦江南所少

魚子蘭

魚子蘭花形似眞珠香亦相等但屬草本莖蔓

上抽數寸一節葉生節間止可盆種插竹爲闌以椶縷繫之莖乃不靡花類粟顆初時色青及變而黃香氣乃發採花置竹箔上以綿紙覆之上鋪新茶經一宿後納入瓶中淪茗能作蘭香清供第一

茉莉

茉莉有藤本木本兩種藤本者叢條並生木本者一幹上發藥若珠圓迎晚而放芬馥絕倫綃帷竹簟臥趁微涼采置枕函旁足清魂夢

素馨

素馨似茉莉而小，葉更纖綠，枝弱不能自立，插竹枝扶之。雨過花間，香芬絕世。

蓮

泛淥池中有紅蓮、白蓮、臺蓮、諸種。葉擎波面，夏雨忽來，千點荷聲，乍緩乍急。涼風過處，香芬襲人。花明淨如拭，清露晨流，晴霞晚映，尤覺鮮妍。使人吟賞忘倦。

木芙蓉

木芙蓉瀟洒無俗姿、花色不一、有白有紅、更有一花而日三變、朝白晚紅、名醉芙蓉者、性本宜水、特於水際植之、緣溪傍渚、密比若林、雜以紅蓼、映以翠葵、花光入波、上下搖漾、猶朝霞散綺、絢爛非常、嘗見宋孝宗書唐人刁光胤木芙蓉畫幅云、託根不與菊爲雙、歷盡風霜未肯降、本是无心豈有怨、年年清艷照秋江、善爲此花寫照矣。

觀音蓮

觀音蓮葉形類芋而大，片葉可以蔽人，色最媚綠。中心抽莖，發花白色，瓣若小蓮。土人謂可救毒螫，以此得觀音之名。

芭蕉

平湖諸家園亭，芭蕉絕少。近從會城移得三四本，種泛淥亭後，密陰冷翠，上襲人衣。晴日對之，亦作風雨之想。幸性本易生，蕉筍駢發，年餘後應可成綠天矣。

美人蕉

美人蕉自粵東來，葉雖不大，而翻風滴雨，自有幽姿。其花開若小蓮，而色正赤，惟中心一朵，曉生甘露，嘗之如飴。

菊

菊花種類甚多，園中栽菊作圃，得數百本，有黃紫紅白藕蜜諸色，每色又各有深淺，并有一本兩色者。其朵瓣亦種種不同，或如毬，或如盤，或如剪翎，或如擘縷，或如松粒，或如柳芽，窮極變態。友人知余嗜菊，多有自遠載送者，環置草堂。

清芬連月而種色之妙以余園所栽者爲最盛

金銀消息

消息菊之小者有黃白二種因色之相似以金銀名之菊最難培此種獨易籬根徧布歷歷如星

秋海棠

秋海棠幽姿冷艷非塵埃中物性特喜之園中陰閱之地無處不種曉風涼露一抹輕紅不覺我情之欲移也

水仙

水仙臘藥春花能傲冰雪寒香冷艷瑩淨不凡
石脚陂陀之處雜種無次清疎可玩性喜得水
離土亦活嘗以古磁盆滿貯清泉置花數苗磊
石擁護花更茂悅山谷所云明窗淨几香氣撩
人也

朝鮮牡丹

朝鮮牡丹卽本草當歸又名文無弱枝嫩葉不
勝風日中心抽細莖花生莖末一條十餘朵麗

北聖抄錄
三
簌下垂狀似小囊俗呼荷包牡丹亦草花中之
艷品也

戎葵

葵有數十種因色之淺深瓣之單複各成一類
余前居苑西時植之最多自四月至十月花開
不斷今園居地大尤得栽蒔葵愛日而不喜肥
但以清水灌之一莖百藥灼灼照人諸色間雜
尤極絢爛

錦葵

錦葵花小如錢，文彩斑斕可愛。高不過一二尺，而蓓蕾攢簇，吐萼盈枝。梅雨淹旬，賴此花點綴，不至寂寞。

秋葵

秋葵黃花綠葉，紫帶檀心，惟玉人道粧，差可彷彿。其風韻耳，與芙蓉前後開放，枝葉亦復相亂。荷池芹岸之上，夾雜種之，雅態可挹。

百合

百合花，一名摩羅春，一莖上抽，四旁出葉，花生

莖端有紅白二種、白者尤勝、每坼一藥、滿庭皆香。

蝴蝶花

蝴蝶花、碧白相雜、上有黃斑、翠點、翩翩之狀、全類蛺蝶、真野卉之佳種。

長春

長春花、色赤黃、類野菊、發藥極多、花不大、放形似小盞、故又名金盞、將薦者、旋即摘去、勿令結子、則新藥旋生、一木可得百餘花、相繼而開、四

時不絕

罌粟

山亭水岸俱種罌粟，有大紅、淺紅、深紫、淡紫、藕合、蜜合、純白、淡綠諸色。一房千萼，簇若剪綃。相傳中秋夜，令女子艷服播種，則來歲發花繁艷絕世。

虞美人

虞美人，莖葉花藥似罌粟而小。或云此花聞人歌聲，能應節而舞。又有舞草之名，花極娟秀。

山丹

山丹有赤有黃四月蠶成繭時此花正放赤似
渥丹黃猶蒸栗一莖直上柔葉護之與百合相
彷彿但大小異耳

剪春羅

剪春羅葉綠而濃開花極盛每瓣刻缺甚多有
如蜀羅被剪發莖叢密足充階砌之觀

剪秋紗

剪秋紗長莖小朵弱不勝風白瓣五出上有紅

絲命童子削竹作小屏，編花於上，亦殊艷冶。

金錢花

金錢花，午開，子落，吹墮苔鋪之上，輪郭圓整，宛然赤仄錢也。

護

護花可玩，可餐，葉色媚綠，花有蜜色、朱色之異。蜜色者有香，朱色者不香。今皆種之。護本從護，有忘憂之意，野人無憂可忘，聊娛春興。

鳳仙

鳳仙雜色善變而平湖所出視他處尤佳紅紫
碧白無所不有有一本兩三色者有一花兩三
色者重跗疊萼莫能名狀

石竹

石竹纖柔易生枝蔓青翠花具五色嫵媚動人
以時培灌亦能作木本重臺

秋牡丹

秋牡丹徧地蔓生葉似牡丹而小黃鬚紫萼艷
色鮮妍可破秋容之蕭瑟

玉簪

玉簪卽白鶴花山谷老人題爲江南第一綠葉
環匝類小甘蕉花似玉搔頭內玲瓏而外瑩潤
香芬酷烈冠於秋花

紫鶴花

紫鶴莖葉花葉與玉簪不異故亦稱紫玉簪玉
簪有香紫鶴無香而嫵媚靚艷却自遠勝五月
發花與朱護山梔同插瓶中晴窗清晝風致不
淺

雞冠

雞冠當暑成花，霜後始萎。若扇若篲，若鳳若芝，形狀各殊，色亦有紅紫黃白碧綠之異。根生石罅中，不須肥土。其本高卑不齊，有矮不數寸者。蘇子由詩注：矮雞冠，卽玉樹後庭花云。

草茉莉

草茉莉有紫白二種，花形似茉莉，而跗較長，中心有鬚，暮開曉謝，殆陰類也。結子初青後黑，內有白粉，可療面斑。

牽牛

牽牛蔓生善緣葉似楓有三尖花不作瓣下小上大曉露未乾輕翠悅目日出卽萎子名天茄以糖飭之可食

西風錦

西風錦與老少年相似葉外青中紫經霜色變青者爲黃紫者成赤階除之下滿目斑斕

老少年

老少年莖葉俱紫秋深鴈來之候葉變而紅末

山聖相集錄
元
梢一叢鮮赤如染亦號鴈來紅此時草木就衰而反成麗采亦屬奇觀

萬壽菊

萬壽菊莖葉細小花赤黃多瓣蒂長寸許不香而艷其開耐久盛於秋深亦有傲霜之意

雙鸞菊

雙鸞菊卽草烏花形如僧帽內藏兩萼若雙鸞之並肩尾翼宛然化工之奇真有不可揣測者其色紫艷繁而且久秋齋之玩冠絕一時

紫鈴

紫鈴莖細葉弱發花至繁一莖可得十餘朵色紫而翠尖瓣五出若小鈴中有黃心輕風拂之搖曳多態

鳳毛

鳳毛引蔓極長葉細如縷附莖而生稠密整齊有若人巧花如野茉莉而小色大紅頗明艷宜結小屏

秦椒

秦椒枝葉盡綠高一二尺開白花結子長二寸
許深秋色紅磊磊可喜味之辛烈過於薑桂

金燈籠

金燈籠元宮中植之號爲紅姑娘其實外裹黃
苞內含紅子一枝得二十餘枚苞作六稜微尖
子如彈丸京師極多余向有秋花雜咏此亦與
焉

龍膽草

龍膽莖長數尺葉相對生花色艷翠如膽形以

細竹引之極供靜玩

淡竹葉

淡竹高數寸花如翠鈿風露之下繽紛有姿細莖多節葉尖而長儼然小竹也爾雅以菉竹爲玉芻豈卽此種耶

車前

車前葉厚而澤長莖多子王旻山居錄有種車前剪苗食法不獨充藥品也階前雜草手加鋤薙此種獨存之

蒲公英

蒲公英小科布地，四散而生。莖端發黃花，若野菊花，殘成綿，風飄着土，卽生新苗，嫩時可食。

石菖蒲

石菖蒲本名堯韭，產山澗砂磧中，萬卉喜肥，此獨喜瘠，以細砂種之，養以清泉，層冰不凋，烈日不萎，座隅清供，罕有其倫。

半夏

半夏苗一莖一花，葉與茨菰似，但極小，每本不

過六七寸、塍籬之下、生發茸茸、初未嘗下種也、園中藥卉、自生者極多、頗有未識其名者、亦不能盡錄之也。

紫蘇

紫蘇香氣清越、摘片葉嗅之、倦悶卽豁、自昔以護蘇並稱、有以也、背面俱紫者爲上、面紫背青者次之、八月作花、九月採子。

薄荷

薄荷與紫蘇同形而異色、香亦相等、聞川湖之

俗以薄荷代茶薺，余喜其辛涼之味，夏月輒煮而啜之。

決明

決明本小末尖，似槐葉，秋開深黃花，結角如小指，長二寸，尤喜其苗葉可作酒麴，餽糟餒醜，與衆同醉，計之最得者也。京師名爲望江南。

麥門冬

麥門冬類石菖蒲，葉更長茂，緣階而生，一名繡墩草。麥冬生土中，根鬚之上，四月抽小莖，開淡

紅花結實圓碧惟吳越有之

天門冬

天門冬莖葉森發花細而白有清香方書多謂天冬與松脂同服可以駐年余素不講服食養生之訣但愛其綠縹聊以娛目而已

艾

艾雖見斥於楚騷然亦香草之一種與蕭不同隙地自生懶加剪薙森森林立風過頗香

菖蒲

菖蒲生淺渚中，不煩排植，春初出水，茸茸短翠，謂之蒲嘴。當夏盛長，與紅蕖青葭互相掩映，亦自可悅。

鹿葱花

鹿葱花六出，儼然蛺蝶之狀。三大圓瓣，三小尖瓣，外藕花色，中心白地，有紅黃細點，搖風弄影，姿韻特妍。

翠雲草

翠雲草性喜陰濕，與芭蕉虎刺秋海棠相似而

較爲易生。北窗背日之地，偶植數莖，時月既久，鋪翠盈堦，漸有入簾之色。

吉祥草

吉祥草不拘水土及石上皆可種，伴以丹芝錦石，清雅特甚。花紫蓓生，頗爲易發。

金絲荷

窗前幽蔭之地，多生金絲荷。其葉大者幾於盈掌，心中抽長鬚，作細白花。根旁時長紅絲，沾土卽成根株，最易繁茂。

鳳尾草

鳳尾草喜陰石罅溪坳足跡罕至之處往往而有幽蘭空谷斯爲近之

書帶草

書帶草葉如細韭性韌而弱蒙茸四垂清風拂之鮮翠足喜

苔

山居懶慢庭院經時不掃過雨之後滿砌皆長莓苔色翠而幽如紺錢散地稍喜門無剝啄不

爲屐齒所侵，得以成其清勝。

柳

柳性易生，橫栽倒插皆可活。早春時嫩綠初萼，柔絲髮鬢，非煙非霧，濃媚迎人。又一種赤幹細枝，葉青如縷，花粉紅色，名三河柳。爾雅之所謂檉也。天將雨，檉先起風以應之，故又稱雨師亦婀娜可愛。

柞

柞樹扶疎多枝，葉細而密。新葉將生，故葉乃落。

其質堅韌可中屋材

榆

榆樹類枌春初緣枝生莢累累成串未熟色青已熟色白結子爲榆錢崔氏月令謂榆錢可羹兼可蒸作糕餌收至冬可釀酒淪過搗羅爲末調以鹽水日中曝曬可作醬

松

松花可服松節可釀松脂可熬松子可餐松濤可聽松陰可坐霜榦煙姿亭亭千尺真山居勝

友也園中有青皮紫皮三鬣五鬣各種皆黃山
天目所產對此風標可爲晚節之助豈僅添雅
興已耶

柏

有刺柏有側柏有瓔珞柏三種枝葉各異刺柏
圓而上指側柏扁而側出瓔珞柏長而下垂皆
貫雪凌霜不改柯葉就中瓔珞一種尤佳堅勁
之中別具嫵娜所謂魏鄭公之娥媚耳

梓

梓樹大數十圍老幹上挺旁枝交讓花最繁形如蛺蝶色淺紅上有深點類洒染所成中含二鬚落時一鬚在花一鬚在蒂余軒前得十餘株土人呼爲佛樹開若紫霞落如紅雨真異觀也

梧桐

梧桐修柯碧葉紆徑之內種之成列綠陰蔚然
曉雨夜月時幽響滴瀝清影扶疎秋聲秋色盡
在於是

槐

橡實似栗而小圓而有尖蒂葉與栗同榦不能
如栗之大親串偶集取其實以充盤核聊同古
人拾橡之意

栗

松盤山外平疇衍迤皆種栗樹大者十數圍結
實甚多新秋剝食芳鮮莫及兼有香氣若桂叢
之始拆八九月時其房自裂命小溪掇拾筐中
懸檐壁多風處俟其少乾皮易脫而味較勝

山榧

來禽坳以種林禽得名不植別樹惟山檀十數
本參差林間亦來禽類也有黃赤二色味兼酸
甘以爲飯餘酒罷之供所益多矣

穀

穀皮類桑而粗葉類桐而多刻缺初夏結實類
楊梅而不可食皮絕柔韌可以取材古人常擣
以爲紙其妙必勝於竹惜其法已不傳矣

冬青

冬青土人呼爲凍青以其嚴寒不凋也漱晚磯

旁數株夾水而植，與烏柏、丹楓高下相間，垂綸
偃仰，縱目皆成佳觀。

皂角

皂角密葉如槐，綠陰低亞，秋來結莢，下出葉底，
離離可觀。園四周皆水，塹岸之上，灌莽成叢，此
樹頗爲秀出。

椶櫚

瀛山蘭渚之地，皆疊亂石爲短垣，不加粉堊，於
牆角植椶櫚三四本，高可齊檐，微風乍拂，輕涼

自生極瀟洒之趣皮有絲縷錯綜如織取爲冠履篋拂等物大稱山居三月間莖内生黃苞狀若魚子可食名曰椶筭亦曰椶魚蒸熟後以蜜醋製之卽千里可致也

漆

漆樹高二三丈柿榦椿葉當暑多陰佳木也吾浙桐江以上山居之民以採漆爲業利最饒沃莊子云桂可食故伐之漆可採故割之也今植於吾園者止取其蔭而不以爲利遂得免於斤

斧蓋散人所樹卽爲散木猶愚公所居卽爲愚谷也天下物豈有常哉

黃楊

黃楊木理細膩枝葉繁多性堅而韌然滋長最難世傳此木終歲長不盈寸遇閏月年則頓而不長蓋物理之至奇者然攷爾雅桐茨菰皆厄閏年又不獨黃楊也

平地木

平地木高數寸葉深綠子先青後紅若小棠梨

經年不落巖洞嵌空處與幽蘭同種點綴良佳

枸杞

枸杞高三五尺叢生枝條有刺夏秋間開細花
隨結小果色紅味甘採曝收藏下酒頗善

黃連

黃連高止尺許其生作叢一莖三葉花實之色
皆黃江文通黃連頌云黃連上草丹砂之次江
南所產不及蜀中爲良然苦口之味殆不可不
備也

茶

吾鄉龍井徑山所產茶皆屬上品偶移其種於圃中栽之發花極香春末綠芽新吐訪得採焙之法手自製成封緘白甕中於評賞書畫時淪泉徐啜芳味絕倫茶喜山石蔭密此地無山故不能多植然亦足解玉川之癖矣

竹

竹於草木之外別爲一類植物之仙品方塘曲徑到處植之宜月宜風宜晴日宜晚雨宜殘雪

至於伏暑方炎、石牀蒲几、坐臥密林中、冷翠襲衣、爽籟盈耳、正未知羲皇上人、視此若何。

鳳尾竹

巖畔堂外、小院數弓、有白石遶牆下、堆疊有法、上植鳳尾竹一叢、長不盈丈、纖枝婀娜、翠葉森發、晚晴風過、洒然絕塵。

慈竹

慈竹心實而節疎、灌生上挺、鞭不旁行、其笋於八月間發、窗前陰間、不宜樹木之處、卽種之、其

下培蒔秋海棠鳳仙諸卉甚覺相宜

毛竹

毛竹大者圍徑二尺許，剝其根爲筆牀酒盞等器，諸用畢給林中多野雉鳴鳩之聲，極其清越。與竹籟相應，昔人謂園居者須是三分水二分竹，一分屋，庶幾近之矣。

斑竹

斑竹碧幹紫紋，娟淨莫比。修篁塢中皆植此種，新梢乍放，殘粉未消，對之令人神遠。

筍

春日發者爲園筍，新苞初迸，嫩美罕匹，真勝於芻牛之腴。焙之作脯，經年可用。夏月竹鞭四行，其穿上而出者爲鞭筍，作羹特佳。竹忌狂鞭，刨去之，則次年竹更茂。冬日生者爲團筍，伏蟄地中，短而節密，所謂蝟腹蛇蚶者是也。京師惟團筍可以攜致，然亦珍貴，不能飽啖，不若此間之不論錢也。年來千畝在胸，不減饒太守矣。

棉

棉葉若牡丹花若秋葵不獨可織亦可玩也平
湖風俗醇樸喜服布素隙地種棉者多餘蔬圃
旁分畦栽插鬱鬱成叢因使家人採花紡織以
供被服

麻

有紫麻白苧二種枝葉扶疎秋夏間發細穗一
朶數千穗白色每歲可三刈取其皮治以爲縷
擇最細者以爲苧衫當暑之服莫適於此

蕨

蕨生野中、春時萌芽拳屈、長而漸展、若鳳尾、莖嫩無葉時取之、蒸曝作蔬、絕美、屑之爲粉、製粬、救之類、味甘滑而色微紫、可稱瓊糜。

薇

薇莖葉氣味皆似豌豆、其藿作蔬入羹皆宜、京洛士大夫爲詩多念故山、薇蕨手擇、口嘗而真知其味者誰耶。

矮黃

矮黃菜中之奇種、惟江浙有之、其生不高、經霜

黃熟因以得名今人稱呼爲黃芽菜聲之訛也
肥嫩易爛食無筋膜味甜而腴與北方之甘肅
菜可以爭勝

恭菜

恭菜葉青莖白狀類白菜但差小耳陸放翁云
吳地四時常足菜一番雨過一番生蔬之同類
異種者甚多隨時茁發足供野人口腹蓋造物
所以厚園居之賜也

莧菜

莧生初夏小摘淨擇一淪卽熟香美勝於衆蔬
有青莧紫莧二種紫者羹汁段紅以送吳杭色
映匙盃

灰莧

灰莧心紅葉綠煮食甚香至秋漸老高六七尺
莖可爲杖輕而且堅勝於筇竹所謂杖藜是也
芥

青芥紫芥白芥皺葉芥因類分畦春秋兩種老
而愈辣頗有薑桂之性作齏最宜收芥子屑之

成末點和食品風味亦佳

諸葛菜

諸葛菜花色紫碧靨艷異常種數本於軒砌之間饒見幽致非凡蔬所能比又四時皆可食詩人所謂蕪菁卽此種也

萊菔

萊菔莖不高而結根甚大謂之蘿蔔有白者有黃者有紅者有紫者紫白二種葉似蕪菁黃紅二種葉似蒿菜春末抽臺發花其根辛而微甘

可生可熟可醬可腊可醋可糖蔬品中之極有益者

菠薐

菠薐根赤色葉青北方呼之爲赤根菜四月起
臺尺許開碎白花此菜播種時必過月朔方生
卽晦日下種與十餘日前種者同出唐會要貞
觀中尼波羅國獻菠薐菜狀類紅藍其所從來
遠矣

白菜

白菜莖扁薄而白，大者高三尺許，爛煮作羹，以
蕺米芼之，雖珍錯不能過也。更有名春不老者，
與白菜相類，而脆嫩尤甚，四時可種，醃食甚美。

芸薹

芸薹單莖圓肥，葉附於莖，嫩時可食，其末發花
如蘿蔔，淪而乾之，製以鹽禦冬上品也。

薺菜

薺雖野草，而有佳味，採取宜在寒食前，東坡與
徐十三書云：今日食薺甚美，不甘於五味，而有

味外之味其法取薺一二升淨擇入淘米三合冷水三升生薑不去皮槌兩指大同入釜中澆生油一觔殼於羹面不得入鹽醋天生此物以爲山居之祿輒以奉傳不可忽也食薺之妙盡此數語矣

苦菜

苦菜花肖野菊春夏皆開一花結子一叢若蒿蒿然根葉皆可食余取以爲常供元人詩盤餐落落對瓜畦杜撰人間苦蕒蠶洵先得我心者

也。

同蒿

同蒿莖肥葉綠、與白蒿同、四月起莖二尺餘可食、一種小者爲茵陳蒿、芳嫩倍之。

生菜

生菜、花如苦蕒、春秋可再種、略點鹽醋、生採食之、甚美、故名。

蒿苳

蒿苳與生菜類、有尖圓二種、尖葉者味苦、圓葉

者氣如香杭四月抽臺如筍謂之高筍余長夏
三餐噉粥飽菜根香味於諸蔬之性獨得其詳
焉

馬齒莧

馬齒莧柔莖布地葉對生比並圓整如馬齒故
名六七月開細花本屬草卉而可以充蔬亦可
入藥

芹

芹性潔氣芳根葉皆堪作蔬圃傍荒澗遍產香

芹白莖翠苗郁郁可愛

薑

薑五月生苗如嫩蘆秋社前後新芽若指名紫芽薑采食無筋膜秋分後采者次之經霜乃老分湖稻蟹極肥脂同切玉搗薑薦之以佐村釀誰謂荒寒寂寞之濱遂無佳味哉

蒜

北方蒜微甘而辛可爲常食南方出者辛而不甘然極能制服食之毒春苗軟美鹽製爲菹亦

佳

薤

薤葉似葱而有稜根似小蒜一本數顆相依而生北人呼爲藟子內則云切葱薤實諸醢以柔之是古人已有醋浸之法性能益氣宣滯於老人尤宜故少陵有衰年味爨之句也

葱

葱名菜伯爲種至多其中絕佳者爲冬葱迎寒茂發香而不帶軟美可食入藥亦宜卽所謂大

官葱也

韭

韭以真定產者爲佳。今杭郡之種肥脆不下真定。其性易生。旋剪旋發。不煩人力。春初雨過。嫩本新抽。噉之神爽。晚菘早韭。並稱山中佳味。信乎不虛。

蠶豆

蠶豆方莖密葉。紫萼皂心。二月花開。被壟和風送香。濃而不媚。初夏其莢與櫻珠並熟。吾鄉風

俗以點新茗老後炒食尤佳長公在黃州追思
與楊宗文諸人往來瑞草橋對坐莊門喫瓜子
炒豆田園真樂自不可忘

扁豆

扁豆花有紫白二色狀亦不一莢生花下花卸
而莢現纍纍成枝烹以侑餐有淡泊之味

豇豆

豇豆作架引之其生易蕃莢如衣帶生必兩兩
並垂有青有紫扁爛間雜

刀豆

刀豆亦喜緣架須乘嫩采之老則不佳矣樂浪有挾劔豆其莢橫斜如人挾劔者殆此種也

西瓜

西瓜各種皮有青有綠瓢有深紅有淡紅有白有淡黃子有紅有黑有白迥不相類炎歊正酷浸以寒泉會客剖嘗涼沁心腑不啻飲沆瀣吸石乳也

甜瓜

甜瓜其小如拳味特甘美北人多於飯後食之謂其能消穀氣也牽蔓被壘纍纍可摘

稍瓜

稍瓜粗於黃瓜色綠而黝縱有白紋界之微凹體光而滑膚實而韌製之以醬足儲一年之供

南瓜

南瓜愈老愈佳宜用子臍煮黃州猪肉之法少水緩火蒸令極熟味甘膩且極香田家一飽之需孰過於此

香瓜

香瓜皮嬌黃，間有青色，斑駁如畫，漿液香甜，瓢肉細膩，披襟逃暑時，得此以潤吟吻，亦一快也。

王瓜

王瓜葉似木芙蓉，花黃，結實似小兒乳，暖處則易生。杜少陵云：陽坡可種瓜。真曲得物情者。瓜質脆嫩，可消酒渴。

絲瓜

絲瓜喜延高架，宜背陰，其實長尺許，嫩時甘滑。

可餐。老者瓢絲若網，可以滌器。平湖種瓜者多於菱灣漁港之旁，結爲低架，碧蔓黃花，下俯流水，燦然可觀，不但有落實之益也。

冬瓜

冬瓜附地徧生，瓢白如玉。逢辰日種之，其生必繁，故黃山谷呼爲辰瓜。

蒲蘆

蒲蘆莖長，須架起，則結實圓正，可蜜煎作果，可削條作乾，小者可作盒，作盞，長者可作灌花噴。

壺亞腰者可盛藥物苦者可治痲

瓠

瓠子苗葉花蔓俱如葫蘆江南人呼曰扁蒲味淡而美且極爽滑幽風所謂八月斷壺卽此固宜以爲常供

茄

茄大小不一種煮食甚甜滑醃製糟醬無所不宜色紫而澤昔人美其名曰崑崙紫瓜

甘露子

園中密樹之下，輒種甘露子。其性喜陰，得樹蔭更易長茂。大者長一二寸，子生根上如聯珠，色白味甘脆，生熟皆可食。

芋

尊溪芹礪之間，多種芋。葉比么荷，綠淨如拭。寒宵擁爐坐話，煨老芋噉之，自謂官廚法饌，不敵其美。彼沒齒於膏粱者，殆未足與語此也。

香芋

蔬香菴前，瓜棚豆架，縱橫如織。香芋亦緣蔓其

中冬來斲土取芋、炊食良佳、其甘潤不及山藥、其香則非山藥所能望也。

山藥

山葉引蔓緣籬、葉厚而澤、開細花、淡紅色、實生葉間、形似小棗、煮食頗香、其根有紫白二種、白者尤細膩、蒸令極熟、糝以蔗霜、以匙抄而噉之、若吸石髓。

蘆

塹河蘆葦、遠近一碧、芙蓉灣、香芹澗、蓴溪、諸處

尤多翠葉停煙白花搖雪當秋水方盛之時坐倚釣篷垂竿其際飄然有五湖之思

蓼

向居苑西於書屋前種紫蓼極盛北地絕無池沼每日遣家僮擔井泉沃之每株皆高六七尺秋來紅穗低垂具有幽意園中多洲渚蓼生甚繁不待灌植沙禽野鷺時來出沒蕭疎秋色在會心者自得之

茨菰

茨菰生水土之交，每窠抽葶一枝，開花數十白瓣，黃心，其根類芋，甘滑不及，而香乃過之。

茭白

茭白多葉如蔗，荻四五月中抽白臺，大若小兒臂，蒸熟甘美而鮮，秋後有實，所謂彫胡米也。炊之作飯，與香稻鬚，佐以蓴羹菘本，老饕之腹屬厭有餘矣。

蓴

蓴菜江南多有，西湖所產尤佳。漁書樓後有陂

塘半畝、匯瀦溪流其中、蓴絲密茂、蓋西湖種也。春夏之交、葉底生津、長寸許、白如水晶、蓴羹之妙、正在此日。袁中郎云、蓴菜香脆柔滑、略如魚髓蟹脂、而輕清遠勝、其品無得當者、惟花中之蘭果中楊梅、可以異類作配、信不虛也。

荇

陂池近岸處、徧產荇菜、葉若荷錢、莖如麥股、五月開小黃花、名曰金蓮。蘭渚下有平池、一方畜金魚百餘尾、每曉皆浮荇葉間、鱗鬣粲然、往來

如織欲作濠濮間想

萍

面背皆青者萍也面青背紫者藻也長及指許面紫而有紋者麻藻也小池風定一望幾成綠茵飛花點之斑駁如繡

藻

水草中惟藻爲雅潔青絲碧縷節節連生每當風水相遭波紋如縠縈帶之趣殊有足觀

芡

荒灣斷塹皆種芡實綠盤鋪水與荷芰相亂彌望田田早秋采實而食有珠之圓有玉之膩水屬諸品此爲上珍芡花向口菱花背日荷花日舒夜斂芡花晝斂宵開閒中消息物理亦有微會

菱

平湖菱出馬濱者爲上有大小二種與菰芡等雜種池塘中秋來自操小槳采摘滿筐柴門月上扣舷浩歌沙洲宿鳥磔磔驚起平生江湖之

興庶可少適矣

芴薺

溪旁水淺處芴薺成叢而生綠苗纖銳中通外直其根大者若栗冷脆殊常滌渴破醒莫出其右